

1976 nr. 44 25. maí**Lög um Fiskveiðasjóð Íslands**

■ **1. gr.** Fiskveiðasjóður Íslands er sjálfstæð stofnun í eigu ríkisins. Útvegsbanki Íslands¹⁾ skal veita sjóðnum nauðsynlega fyrirgreiðslu og starfsaðstöðu. Sjóðurinn lýtur sérstakri stjórn, eins og segir í lögum þessum. Heimili og varnarping sjóðsins er í Reykjavík.

¹⁾ Sjá l. 7/1987, 14. gr.

■ **2. gr.** Hlutverk Fiskveiðasjóðs er að efla framleiðslu og framleiðni í fiskveiðum, fiskiðnaði og skyldri starfsemi með því að veita stofnlán með veði í fiskiskipum, nýsmíðum og eldri, vinnslustöðvum, vélum og mannvirkjum, sem að dómi sjóðsstjórnar eru í þágu sjávarútvegsins, þ. á m. skipasmíðastöðvum, dráttarbrautum, viðgerðarverkstæðum, veidarfaragerðum og verbúðum.

□ Stjórn Fiskveiðasjóðs er heimilt að setja á fót sérstaka tæknideild, er sé stjórninni til ráðuneytis um tæknileg atriði í sambandi við mat á lánsúmsóknum og til þess að fylgjast með smíði og búnaði fiskiskipa, fiskvinnslustöðva og annarra mannvirkja, sem Fiskveiðasjóður veitir lán til, svo og að fylgjast með nýjungum á þeim sviðum.

■ **3. gr.** Auk stofnfjár samkvæmt 3. gr. laga nr. 75 13. maí 1966, um Fiskveiðasjóð Íslands, skal fjárflokkun til Fiskveiðasjóðs vera með eftirtöldum hætti:

a. Vextir af lánum og öðrum kröfum.

b. Útflutningsgjöld af sjávarafurðum, sem renna til sjóðsins lögum samkvæmt.

c. Til viðbótar tekjum sjóðsins skv. b-lið greiðir ríkissjóður honum árlega fjárhæð er nemi $\frac{3}{4}$ hlutum af tekjum skv. b-lið.¹⁾

d. Til viðbótar framlagi til sjóðsins skv. b- og c-liðum greiðir ríkissjóður honum árlega 35 millj. kr.¹⁾

e. Lántökur innanlands og erlendis, sbr. þó 7. gr. laga nr. 30/1960.²⁾

¹⁾ Á árinu 1995 falla niður framlög úr ríkissjóði, sbr. l. 148/1994, 28. gr. ²⁾ Nú l. 87/1992.

■ **4. gr.** Stjórn Fiskveiðasjóðs getur ákveðið stofnun nýrra lánaflokka. Skal nánar kveðið á um þá í reglugerð, sem ráðherra setur, að fengnum tillögum stjórnar sjóðsins.

■ **5. gr.** [Ríkissjóður ber eigi ábyrgð á þeim skuldbindingum sem Fiskveiðasjóður stofnar til eftir 1. mars 1992.]¹⁾

¹⁾ L. 2/1992, 6. gr.

■ **6. gr.** Fiskveiðasjóður heyrir undir ráðherra þann, sem fer með sjávarútvegsráðgjafi. Skal stjórn hans vera í höndum 7 manna, sem ráðherra skipar til tveggja ára í senn og skulu 6 þeirra skipaðir samkvæmt tilnefningum og 1 án tilnefningar. Hver eftirgreindra aðila tilnefni 1 fulltrúa í stjórnina: Seðlabanki Íslands, Landsbanki Íslands, Útvegsbanki Íslands,¹⁾ Landssamband ísl. útvegsmanna. Eftirtalin samtök í fiskiðnaði tilnefna sameiginlega 1 fulltrúa: Sölumiðstöð hraðfrystihúsanna, Sjávarafurðadeild Sambands ísl. samvinnufélaga og Sölusamband ísl. fiskframleiðenda. Verði þessir aðilar ekki sammála um tilnefningu, skal ráðherra tilnefna fulltrúa þennan. Sjómannasamband Íslands og Farmanna- og fiskimannasamband Íslands skulu tilnefna sameiginlega 1 fulltrúa, en verði þessir aðilar ekki sammála skal ráðherra tilnefna hann. Jafn margir varamenn skulu skipaðir á sama hátt. Ráðherra skipar formann og varaformann úr hópi hinna 7 stjórnarmanna. Til þess að fundur sjóðsstjórnar sé lögmætur, þarf meiri hluti stjórnarinnar að sitja hann, og ræður einfaldur meiri hluti fundarins ákvörðun stjórnarinnar.

□ Ráðherra ákveður þóknun stjórnarmanna.

¹⁾ Sjá l. 7/1987, 14. gr.

■ **7. gr.** Verkefni stjórnar Fiskveiðasjóðs eru þessi:

a. Ákvarðanir um lántöku og aðra fjárflokkun til starfsemi sjóðsins og útgáfa skjala í því sambandi.

b. Ákvarðanir um rekstrar- og greiðsluáætlanir Fiskveiðasjóðs, er gerðar skulu fyrir fram eitt ár í senn.

c. Ákvarðanir um útlán sjóðsins og lánakjör.

d. Úrskurður reikninga sjóðsins og ákvörðun um ráðstöfun tekjuafgangs, svo og ákvörðun um afskriftir af kröfum hans.

e. Ráðning forstjóra sjóðsins. Heimilt er einnig að ráða aðstoðarforstjóra.

f. Skipun matsnefndar.

■ **8. gr.** Forstjóri sjóðsins hefur á hendi alla daglega starfsemi sjóðsins eftir nánari fyrirmælum í reglugerð og samkvæmt ákvörðunum sjóðsstjórnar. Í reglugerð má einnig ákveða, að sjóðsstjórnin geti veitt forstjóra heimild til að ákveða lánveitingar úr sjóðnum innan tiltekinna marka. Stjórn Útvegsbanka Íslands ræður aðra starfsmenn sjóðsins en um ræðir í 7. gr., samkvæmt tillögum forstjóra sjóðsins. Um laun og kjör þeirra gilda sömu ákvæði og um starfsmenn Útvegsbankans.

■ **9. gr.** ...¹⁾

¹⁾ L. 7/1987, 2. gr.

■ **10. gr.** Starfsár Fiskveiðasjóðs er almanaksárið. Af tekjum hvers árs skal greiða kostnað við rekstur sjóðsins svo og töp vegna afskrifaðra lána. Forstjóri sjóðsins skal sjá um að ganga frá reikningum hans fyrir 1. mars ár hvert og hafa afhent þá stjórn sjóðsins. ...¹⁾ Ráðherra staðfestir reikninga sjóðsins að fengnum úrskurði stjórnar ...¹⁾ Ársreikninga skal birta í Stjórnartíðindum og í ársskýrslu Útvegsbankans.

¹⁾ L. 12/1986, 13. gr.

■ **11. gr.** Öll lán Fiskveiðasjóðs til fiskiskipa skulu tryggð með 1. veðrétti í skipunum. Til nýrra fiskiskipa, sem smíðuð eru innanlands, mega lán nema $\frac{3}{4}$ hlutum kostnaðar eða matsverðs, þess er lægra reynist, en allt að $\frac{2}{3}$ hlutum kostnaðarverðs eða matsverðs með sama hætti, séu skipin smíðuð erlendis. Til eldri fiskiskipa mega lán nema $\frac{1}{4}$ hluta kaupverðs eða matsverðs, þess er lægra reynist, og skulu þá meðtaldir eftirstöðvar af lánnum sjóðsins, sem fyrir kunna að vera.

■ **12. gr.** Lán, sem veitt eru gegn veði í öðrum eignum en skipum, að viðbættum lánnum, sem hvíla á eigninni við veðsetningu með forgangsveði, mega hæst nema 60% af matsverði.

■ **13. gr.** Stjórn Fiskveiðasjóðs ákveður lánstíma að höfðu samráði við sjávarútvegsráðherra og stjórn Seðlabankans.

■ **14. gr.** Umsækjendur um lán úr Fiskveiðasjóði geta valið um, hvort heldur þeir leggi lánbeiðni sínar fyrir Fiskveiðasjóð eða viðskiptabanka sinn. Þær lánbeiðni, sem lagðar eru fyrir viðskiptabanka umsækjenda, skal viðskiptabankinn senda Fiskveiðasjóði ásamt umsögn sinni. Fiskveiðasjóður skal á sama hátt leita umsagnar viðskiptabanka umsækjenda um umsóknir þær, er honum berast beint, áður en þær eru afgreiddar.

■ **15. gr.** Stjórn Fiskveiðasjóðs skal ákveða vaxtakjör, dráttarvexti og lántökugjald, að höfðu samráði við sjávarútvegsráðherra og Seðlabankann, enda séu vextirnir ekki hærri en Seðlabankinn ákveður vexti hæsta af sambærilegum skuldum.

□ Vextir af lánum greiðast eftir á á gjalddögum afborgana. Stjórn sjóðsins ákveður gjalddaga lána við hina ýmsu lánaflokka.

□ Lántakendur skulu greiða matskostnað og annan beinan kostnað samkvæmt nánari ákvörðun sjóðsstjórnar.

■ **16. gr.** Nú tekur sjóðurinn erlent fé að láni og lánar það innanlands, og er þá heimilt að semja svo um við lántakendur, að þeir beri halla eða njóti hagnaðar, er verða kann vegna gengisbreytinga, þannig að vaxta- og afborganagreiðslur hækki eða lækki í íslenskum krónum í hlutfalli við slíkar breytingar.

■ **17. gr.** Skyllt er þeim, sem lán fá úr Fiskveiðasjóði, að láta Reikningaskrifstofu sjávarútvegsins í té afrit af rekstrar- og efnahagsreikningum fyrirtækja sinna í því formi, sem Reikningaskrifstofan ákveður.

■ **18. gr.** Stjórn Fiskveiðasjóðs skal skipa sérstaka matsnefnd til þess að meta þær eignir, sem í ráði er að veðsetja Fiskveiðasjóði. Skal nefndin skipuð þremur mönnum. Nefndin kýs sér formann. Skal nefndinni heimilt með samþykki stjórnar Fiskveiðasjóðs að skipa menn til þess að meta eignir á sínum vegum, enda skal hún endurskoða matið og staðfesta það. Eignir skulu metnar til endurkaupsverðs, að frádregnum eðlilegum afskriftum, er miðast við rýrnun eignarinnar, frá því að hún var ný. Skal matsnefndin semja nákvæmar reglur um framkvæmd matsins, sem staðfestar skulu af stjórn Fiskveiðasjóðs. Lánbeidendur greiða matskostnað.

□ Heimilt er matsnefndinni, eftir því sem henni þykir rétt, að notfæra sér mót, sem unnin hafa verið á vegum Fiskveiðasjóðs, Ríkisabyrgðasjóðs og Stofnlánadeildar sjávarútvegsins eftir 1961.

■ **19. gr.** . . . ¹⁾

¹⁾ L. 48/1992, 4. gr.

■ **20. gr.** Skyllt skal lántakendum að hafa hinar veðsettu eignir svo hátt váttrygðar, að vel nægi fyrir áhvílandi lánunum,

og tekur veðréttur Fiskveiðasjóðs jafnan einnig til váttryggingarfjárins. Ef til útborgunar váttryggingarfjár kemur, getur Fiskveiðasjóður krafist þess, að honum sé greidd beint upphæð, sem svarar til áhvílandi láns eða lána hans, enda sé tekið fullt tillit til þeirra veðhafa, er á undan eru í veðröð.

□ Öllum skuldunautum Fiskveiðasjóðs er skylt að láta sjóðnum í té árlegt afrit af rekstrar- og efnahagsreikningum sínum í því formi, sem hann ákveður.

■ **21. gr.** Heimilt er að telja lán eða eftirstöðvar láns úr Fiskveiðasjóði fallin í gjalddaga án uppsagnar:

a. þegar greiðslur af lánunum eru ekki inntar af hendi á réttum gjalddaga,

b. við eigendaskipti að veði fyrir láni, ef veðið ferst eða rýrnar verulega í verði, er selt eða sett á uppboð, enda skal bæði seljanda og kaupanda skylt að tilkynna sjóðnum eigendaskipti þegar í stað,

c. ef hin veðsetta eign er ekki starfrækt í 6 mánuði eða meira samfleytt, eðli sínu samkvæmt og tilgangi,

d. ef hin veðsetta eign er flutt úr þeim stað, þar sem hún var starfrækt, er lán var veitt,

e. ef lántaki hættir störfum eða breytir rekstri sínum að verulegu leyti að dómi sjóðsstjórnar.

■ **22. gr.** . . . ¹⁾

¹⁾ L. 90/1991, 90. gr.

■ **23. gr.** Skuldunautar Fiskveiðasjóðs eru skyldir til þess að fullnægja öllum kvöðum og skuldbindingum, sem á þá eru lagðar í lögum og reglugerðum fyrir Fiskveiðasjóð.

■ **24. gr.** Sjávarútvegsráðherra getur með reglugerð¹⁾ sett nánari ákvæði um starfsemi Fiskveiðasjóðs.

¹⁾ Rg. 277/1991, sbr. 300/1993, 378/1993, 534/1993, 234/1994 og 316/1994.

■ **25. gr.** . . .

■ **26. gr.** . . .

[Ákvæði til bráðabirgða.]¹⁾

¹⁾ L. 40/1984. Sjá Stjóð. A 1984, bls. 50.